



Komunikadu Imprensa

04 Juñu 2020

JSMP apresia TR nomea tan juis permanente ida ba Tribunál Distritál Oekusi

JSMP apresia aas ba Tribunál Rekursu (TR) ne'ebé nomea tan juis permanente na'in ida iha Tribunál Distritál Oekusi (TDO) hodi apoiu juis Administradór TDO ne'ebé durante tempu naruk atende mesak kazu sira iha juridisaun refere.

Iha 02 Juñu 2020 ne'e, Tribunál Rekursu fó tomadade pose ba juis na'in 4 kompostu husi Dr. Hugo da Cruz Pui ne'ebé hetan pose sai hanesan Juis Administradór ba Tribunál Distritál Oekusi (TDO), hodi troka juis administrador tuan, Dr. João Ribeiro. Enkuantu juis estajáriu na'in 3 ne'ebé mak hetan pose ba juis permanente: Dr. Yudi Pamukas, Dra. Patricia de Araújo Fatima Barreto Magno Xavier, Dr. Evangelino Belo hetan pose ba juis permanente. Tribunál Rekursu antes ne'e koloka ona juis Dr. Yudi Pamukas sai hanesan juis permanente ba TDO, Juisa Dra. Patricia de Araújo F.B.M. Xavier sai juis permanente ba Tribunál Distritál Suai (TDS) no Juis Dr. Evangelino Belo koloka iha Tribunál Distritál Dili.

“JSMP apresia aas tebes desizaun Tribunál Rekursu nian hodi nomeia tan juis na'in ida hodi apoiu juis administradór TDO nian ne'ebé durante tinan sanulu resin mesak deit halo atendimentu ba kazu singulár sira esepu kazu koletivu tanba hetan apoiu juis na'in rua hosi Tribunál Distritál Dili. Espera katak liuhusi rekursu ne'ebe aumenta, bele ajuda aselera kazu sira iha TDO,” dehan Sra. Ana Paula Marçal, Diretóra Ezekutiva JSMP.

Tuir observasaun JSMP nian, juis na'in ida de'it prejudika julgamentu balun tenke adia bainhira juis refere moras ka partisipa tiha enkontru urjente ruma iha Dili. Situausaun ne'e mós afeita ba julgamentu ba kazu koletivu sira tanba dalaruma tenke adia bainhira juis na'in rua husi Dili hetan impedimentu.

Relasiona ho kestaun ne'e, iha JSMP nia relatóriu sira inklui komunikadu imprensa antes*, JSMP rekomenda ba Tribunál Rekursu atu aumenta número juis iha TDO atu la impede julgamentu koletivu sira tantu julga iha tribunál permanente no iha movel. Maski durante ne'e TDO, hetan apoiu husi Tribunál Distritál Dili (TDD) bainhira julga kazu koletivu iha edificiu tribunál permanente. Maibé tanba iha tinan 2020 ativu ona programa julgamentu movel iha TDO, presiza

* Bele asesu iha JSMP website : http://jsmp.tl/wp-content/uploads/PrJulgamentuMOVELTribunalOEKUSI_TETUM.pdf

tebes juis permanente pelumenus na'in ida nune'e bainhira marka oráriu julgamentu kazu koletivu, presiza deit juis na'in ida husi TDD. Atu nune'e bele kontribui ona estadu nia poupana ba gastu iha osan viajen ba juis na'in rua husi Dili ba iha TDO.

JSMP fiar katak ho prezensa juis permanente ida tan iha TDO ne'e, bele fahe oráriu julgamentu ne'ebé di'ak entre juis sira ne'e, nune'e bainhira juis ida prezide hela julgamentu enkuantu juis ida seluk bele iha tempu halo analiza ba kazu sira, lee referénsia hodi hasai koñesimentu no partisipa iha eventu importante sira.

Atu hetan informasaun kompletu bele kontaktu:

Ana Paula Marçal

Diretóra Ezekutiva JSMP

Email: ana@jsmp.tl

Telefone: 3323883 | 77040735